

FUTBOLA



Martin Gonzalez Oviedoren aurka zelairatzeko moduan izango da. JOXE

Martin Dominguez gogor ari da lanean igandean jokatzearren

I. IBARRA / IRUÑA

Osasuna buru-belarri ari da Oviedoren aurkako partidua prestatzen. Atzoko entrenamenduan jokalarien artean presioa landu zuten. Martin Dominguez, Cadizen Arozarenak ordezkatu zuen jokalaria, gogoz aritu zen atzo lanean igandean jokatzeko asmoz. Kataluniarrak adierazi zuenez «Pedro Marik esan zuen zelaia kaskar samar zegoela ni bezalako jokalarik batentzat. Argi utzi zuen nik ez nuela Españolen aurkako partidua pagatu beharrik. Joko asko sortzen duen ni bezalako jokalarik batentzat txarki zegoen zelaia eta».

Datorren igandean ordea Martin Dominguez hasierako hamaikakoan egonen da ziurrenik, aurrelari bizkorren beharrean bait dago Osasuna. Berak atzo aitortu zuenez, «lanean tinko nabil igandean hor egoteko».

Erdilari gorritxoaren ustez igandeko partidua «oso itsusia izan zen, ez zen futbol polita iku-

si. Osasunak lan asko egin zuen defentsan eta borroka eta gogoa erakutsi zuen. Gainera orain arte falta zitzaigun zortea izan genuen. Hiru-lau aldiz ailegatu ginen atera eta bi gol sartu genituen. Zoritxarrez beste batzuetan askoz ere hobeki egin dugu, baina emaitzak txarragoak izan dira».

Martin Dominguezek nahiago du etorkizunaz ez mintzatzea. «Asteroko lana bete behar dugu, igandeko partidua irabazi eta ea hemendik aurrera lehen ziguten beldur bera diguten». Igandean Oviedo izanen dute aurrez aurre gorritxoek. Oviedo talde ona da eta menperatzen zaila. Azken urteotan Sadarren berdinketa lortu du. «Astero bezala partidua zaila izanen dugu. Kostata irabazten du aurten etxean, baina kanpoan emaitza hobeak lortu ditu».

Taxoaren giro lasaia zegoen entrenamenduan. Pasa den aste-ko kritikak ahaztu egin dira, eta beltzetik zurira dagoen distantzia egun batean gaintu dute bertako kazetari eta zaletuek.

Jon Uribarrena: «Oso triste nago, Zuzendaritza ez da zuzena izan»

Juan Elejalde eta Antonio Muñozek Zuzendaritza Batzordea utzi dute

Jon Uribarrena gaztea ez da Logroñes taldera joango atzo Txutxi Aranguren Athleticen kirol zuzendariak esandakoaren arabera. Zurigorrien Zuzendaritza Batzordeak 15 milioi pezeta eskatu zizkion Marcos Egizabalek zuzentzen duen taldeari Uribarrena uzteagatik, eta Logroñesek ezezko borobila eman zion Athletici. Heynckes eta Aranguren konforme zeuden arren, Zuzendaritza Batzordeak kontrako erabakia hartu zuen.

RAMON BASALDUA / BILBO

Jon Uribarrena Logroñeseko jokalaria izango zela ziurtzat jotzen zuten atzo komunikabide guztiek. Jupp Heynckes Athleticen entrenatzailea eta Txutxi Aranguren kirol zuzendaria Uribarrena Logroñesi uztearen alde agertu ziren arren, Ibaiganen bildu zen Zuzendaritza Batzordeak, jokalaria Bilboko taldean jarraituko zuela erabaki zuen, «diru arazoak» direla eta.

Logroñesek ez zuen dirurik ordaindu nahi Uribarrena euren taldera eramateagatik eta Athleticen arduradunen ezetza jaso du. Jon Uribarrena bera da kalteuena inolako zalantzarik gabe. «Athleticeko Zuzendaritza Batzordea ez da zuzena izan nirekin. Oso triste nago, ez beste taldera joan nahi dudalako, jokatu barik nagoelako eta Logroñora itzul-



Uribarrenak (Heynckesen aurrean) Athleticen segituko du. L. I. GARCIA

tzeko aukera emango zidatela uste nuelako baino», adierazi zuen atzo Lezaman Jon Uribarrenak.

ERABAKI GOGORRA JOKALARIARENTZAT

Uribarrenak 23 urte besterik ez ditu eta ez du minutu bat bera ere jokatu Liga txapelketan, Logroñesetik etorri zenetik. «Denboraldi osoa jokatu barik betetzen badut, txarra izango da niretzat noski, baina taldearentzat ere ez da ona izango, ezin izango bait naute saldu denboraldi amaieran», adierazi zuen

atzo Lezaman triste samar agertu zen Jon Uribarrena gazteak.

Jon Uribarrena ordea, Jupp Heynckes entrenatzailearen alde agertu zen atzo. «Pozik nago Heynckesekin. Nirekin berba egin eta gauzak argi eta garbi utzi dizkit. Era berean, aurrelari bat gehiago eduki nahi zuen arren, baiezkoa eman zion ni Logroñesera joateari». Gauzak horrela, Uribarrenak Athleticen jarraituko du eta inork beste talde batera eraman nahi badu, badaki dirua ordaindu behar izango duela.

Toshackek zehaztuta du hamaikakoa Cadizen aurkako partiduari begira

PELLO AIESTARAN / DONOSTIA

Realak atzo goizean Zubietan egindako entrenamenduan ez zen gauza aipagarriarik gertatu. Herenegungo saioan gauzak nahiko argi geratu baziren, atzo ere nahiko argi geratu zen Toshackek Cadizen kontra Atotxan zelairatuko duen hamaikako titularra. Dirudienez, galestarrak bost defentsarekin jokatu du andaluziarren aurka.

Bixio Gorritz veteranoak berriro ere tokia izango du defentsaren erdialdean, Larrañaga kapitaina eta Alaberekin batera, eta Jokin Uriak ezker hegaletik joka dezake. Eskuinaldean berriz, Imanol izan daiteke. Txema Lumberras nafarra beraz, ordezkoen artean geratuko litzateke. Erdialdean,


Oceano, Guruzeta eta Imazek postua ziurtaturik dute, eta zalantza bakarra geratzen den beste postuan dago. Bittor Alkiza edo Miguel Fuentes zelairatu daitezke, eta atzo ikusitakoaren arabera behintzat, badirudi Fuentesek aukera handiak dituela. Aurrealdean beti bezala, Kodro bosniarra arituko da. Dena den, hurrengo entrenamenduetan ikusi egin beharko da zein den Toshacken planteamendua.

Beraz, eta gauzak horrela, hau izan daiteke Realaren hamaikakoa Cadizen kontrako partidurako: Yubero, Imanol, Larrañaga, Alaba, Gorritz, Uri; Oceano, Guruzeta, Imaz, Fuentes; Kodro. Deialdia osatzeko aukeratuak Lumberras, Alkiza, Pikabea, Estefano eta Patxi izan-

go lirateke. Loinaz, Irazoki eta Agirre kanpoan geratuko lirateke. Gaur Realeko jokalariek atsedena eguna izango dute, eta berriro ere bihar itzuliko dira lanera Zubietan.

EMERY ETA AGIRRE KIROFANORA

Real B taldeko Emery eta Agirre jokalariei ebakuntza egingo diete gaur Gipuzkoako Poliklinikan. Atxalandabaso, Albillos eta Escobar doktoreek egingo dute ebakuntza, artroskopia teknikaren bidez. Bi jokalariek aste batzuk beharko dituzte guztiz osatzeko, eta beraz hurrengo partiduetan ez dute jokatzetik izango. Ez doaz gauzak batera ondo Miguel Etxarriren mutilentzat aurtengo denboraldian.



Bixio Gorritz hamaikako titularrera itzul daiteke igandean. VILLAGRAN